

*Morning Dogri News Bulletin 24-04-2018, 09:20 Hrs.*

मार्निंग डोगरी न्यूज बुलेटिन

तरीक 24-04-2018

समां 0920 Hrs.

- प्रधानमंत्री नरेन्द्र मोदी होर राष्ट्रीय ग्राम स्वराज अभियान तैहत् मध्य प्रदेश थमां अज्ज राष्ट्रीय पंचायत दिवस उप्पर कार्यक्रमें दी शुरूआत कराडन।
- जम्मू-कश्मीर इच बी राष्ट्रीय पंचायती राज दिवस दे मौके उप्पर केई कार्यक्रम लोआए जा'रदे न।
- पाकिस्तान ने इक बारी परतियें संघर्ष विराम दी खलाफवर्जी करदे होई बन्ने पारां भारतीय ठिकानें पर गोलीबारी कीती।
- दक्खनी कश्मीर दी त्राल थाहर लाम दे जंगलें सुरक्षाबलें ते आतंकवादियें बश्कार टाक्करा भक्खी पेआ ऐ।
- जम्मू दे साईंस कॉलेज दे खेड्ड मैदान पर सुनने इच असमर्थ यानि बौले खढारियें लेई 7मीं उत्तरी ज़ोन क्रिकेट प्रतियोगिता करोआई गई।

<><><><><>

**PM-Gram Swaraj**

प्रधानमंत्री नरेन्द्र मोदी होर अज्ज राष्ट्रीय पंचायती राज दिवस दे मौके उप्पर मध्यप्रदेश दे मॉडला ज़िले च राष्ट्रीय ग्राम स्वराज अभियान दी शुरूआत करडन। इस स्कीमै तैहत् Panchayat Mission Mode परियोजना तैहत् सिखलाई, ढांचागत निर्माण ते e-Governance आलियें पैहलकदमियें च तेजी आनने बक्खी विशेष ध्यान दित्ता जाग। इस मौके मोदी होर मुख्य भरै च पंचायती राज गतिविधियें गी संबोधत करडन। पिछले हफ्ते आर्थिक मामले सरबंधी मंत्रीमंडल दी कमेटी नै नमें सिरैया तैयार कीती गेदे केंद्र प्रायोजत स्कीम-राष्ट्रीय ग्राम स्वराज अभियान गी मंजूरी दित्ती ही। इस स्कीम गी मंजूरी दित्ती ही। इस स्कीम गी मुख्य दे सभ्मनें

राज्ये ते केंद्र शासत प्रदेशे च लागू कीता जाग ते एहदे च ऐसे इलाके जित्थे पंचायतां नेई ऐन उत्थे ग्रामीण मकामी सरकार दे संस्थाने गी बी शामिल कीता जाग।

<><><><><>

### **Panchyat Day-Jammu (Byte)**

राष्ट्रीय पंचायती दिवस दे मौके उपपर मुख्ख दे बाकी हिस्से आला लेखा जम्मू-कश्मीर इच बी जिला दे पंचायत सतह उपपर केई कार्यक्रम लोआए जा'रदे न। जम्मू खित्ते इच बी इस मौके उपपर केई ग्राम सभाएं दा सरिस्ता कीता जा'रदा ऐ।

<><><><><><>

### **JMC-SBM**

जम्मू शैहरे दे बक्ख-बक्ख हिस्से च साफ-सफाई दे कन्नो-कन्नी शैहरै गी शैल सनाखड़ा बनाने दे कम्मे-कारवाईये तैह्त जम्मू नगर निगम पाससेआ सड़कै कंडे कन्धे पर चित्रकारी करने दी प्रतियोगिता दा सरिस्ता कीता जा'रदा ऐ। निगम दे कमीशनर रमेश कुमार होरें इस सिलसिले च कल प्रतियोगिता दा रस्मी उद्घाटन कीता जिसी जम्मू-कश्मीर बैंक दे सहयोग कन्ने 23 कोला 25 अप्रैल तोड़ी लोआया जा'रदा ऐ। चित्रकारी प्रतियोगिता दे विषय न, स्वच्छ भारत मिशन, स्मार्ट सिटी जम्मू कुदरत ते पर्यावरण, जम्मू दी कला संस्कृति ते विरासत ते होर केई समाजी संदेश। प्रतियोगिता दे खीररै च सम्भने शा बेहतर त्रौं पंचायते गी नकद इनाम, स्मृति चिन्ह ते प्रशास्त्री पत्र दित्ते जांडन।

<><><><><><>

### **State-Cabinet**

रिआसती मंत्रिमंडल दी बैठक, जेड़ी अज्ज जम्मू इच मुख्खमंत्री महबूबा मुफ्ती हुंदी अध्यक्षता इच लगा दी ऐ, इच उस अध्यादेश गी मंजूरी दित्ते जाने दी संभावना ऐ जेदे इच लौहकी बरेसू दिये कुड़िये दा बलात्कार करने आले खलाफ सख्त शा सख्त सजा जेदे इच मौत दी सजा बी शामिल ऐ, दित्ते जाने दा प्रावधान ऐ। रिआसती मंत्रिमंडल आस्सेआ सरकारी कर्मचारिये ते पेंशनरे दे हक

इच 7में तनखाह कमीशन दियें सिफारशें दी अमलावरी सरबंधी फैसला लैते जाने दी बी संभावना ऐ। सरकारी सूत्रें मुजब मंत्रिमंडल दी बैठक बड्डलै 11 बजे सिविल सैक्ट्रे इच मुख्मंत्रि महबूबा मुफ्ती हुंदी अध्यक्षता इच लग्गा दी ऐ, जेदे इच प्रशासन सरबंधी नेकां महत्वपूर्ण मुद्दें पर चर्चा कीती जाग, जेड़े मते चिरै थमां मंजूरी लेई बकाया पेदे न। दरबार मूव शा पैहले एह मंत्रिमंडल दी खीरी बैठक ते मंत्रिमंडल दा खीरी फेरबदल होग।

<><><><><><>

## Reshuffle

बीजेपी अध्यक्ष अमित शाह अज्ज जम्मू-कश्मीर दी पीडीपी-बीजेपी आली गठबंधन सरकार इच पार्टी दे मंत्रियें दे फेरबदल सरबंधी मुकदा फैसला लेई सकदे न। जम्मू इच पार्टी सूत्रें मुजब, बीजेपी दी आला कमान दी बैठक अज्ज नमीं दिल्ली इच लग्गा'रदी ऐ। उपमुख्मंत्रि डॉक्टर निर्मल सिंह, बीजेपी दे प्रदेश प्रधान सत शर्मा ते पार्टी दे आयोजक सचिव अशोक कौल होर बैठक इच हिस्सा लैने गित्तै कल नमीं दिल्ली पुज्जे। बैठक इच राम माधव, केंद्री राज्यमंत्रि डॉक्टर जितेन्द्र सिंह ते अविनाश राय खन्ना होर बी हिस्सा लै'दे हे। जंगलात मंत्री लाल सिंह ते बपार मंत्री चंद्र प्रकाश गंगा हुंदे कटुआ दे बलात्कार ते हत्या मामले परैत इस्तीफा देने कारण मुख्मंत्रि महबूबा मुफ्ती हुंदी कैबिनेट इच फेरबदल जरूरी हा। जंगलात, उद्योग ते बपार मंत्रालयेंद । कम्मकाज उपमुख्मंत्रि डॉक्टर निर्मल सिंह हुंदे कोल ऐ।

<><><><><><>

## ANS-WSS

पीएचई, सिंचाई ते हाड़ें दी रोकथाम सरबंधी मैहकमें दे मंत्री शाम लाल चौधरी होरें कल कोटरंका दी अन्स थाहरै उप्पर पानी सप्लाई स्कीम ते कन्नै गै मंदिर गला इच सिंचाई मुआयना Hut दा उद्घाटन कीता। इस मौके खुराक, नागरिक आपूर्ति ते उपभोक्ता मामलें सरबंधी मंत्री बी उंदे कन्नै हे। 7 करोड़ 49 लक्ख दी लागतै कन्नै NRD-WP तैह्त सबूरी होई दी पानी सप्लाई स्कीम हुब्बी, रेहान, स्वारी, तराला, कटिरंका, धार संकरी ते आले-दुाले दे होरनें ग्राएं दे 42 हजार शा मते जीएं गी पीने दे पानी दी सप्लाई गित्तै तेआर ऐ। इस मौके किट्टै गी संबोधित करदे होई शाम चौधरी होरें इस गल्लै गी दोहराया जे सरकार राज्य दे सभ्मनें इलाकें इच पीने दा साफ पानी उपलब्ध कराने लेई बचनबद्ध ऐ।

<><><><><>

## Ceasefire

पाकिस्तानी बलें पुंछ ज़िले च जन्दी संजा नियंत्रण रेखा पर संघर्ष विराम दी इक बारी परतियें खलाफवर्जी करदे होई भारी गोलाबारी कीती ऐ। स्हाड़े जम्मू संवाददाता योगेश शर्मा ने जानकारी दित्ती ऐ। ज़िले दे कृष्णा घाटी सेक्टर च कल संजा कोई साड्डे'क पंज बजे पाकिस्तानी बलें बिजन भड़कावे दे किश भारतीय चौकिएं ते सिविल रिहाइशी इलाकें गी नशाना बनांदे होई भारी गोलाबारी कीती ऐ। उत्थे तैनात भारतीय फौज दे जवानें बी पाकिस्तान दी इस हिमाकत दा पूरी तगड़ेयाई कन्ने शैल बनकाईयै परता दित्ता। जेदेबाद द'ऊं तरफा गोलाबारी दा सिलसिला कोई द'ऊं घंटे तोड़ी जारी रेया। ऊआं इत बक्खी कुसै जानी नुक्सान जां कुसै दे घायल होने दी कोई खबर नेई ऐ।

<><><><><>

## Encounter

दक्खनी कश्मीर दे पुलवामा ज़िले च तराल Sub-Division हेठ पाँदे लाम आले जांगली इलाके च अज्ज बडलै किश वेपन्छानू आतंकवादिएं कन्ने टाकरा भखी पेदा ऐ। रक्षा सूत्रे आकाशवाणी गी जानकारी दित्ती ऐ जे घट्टो-घट्ट 2 जो 3 आतंकवादिएं गी घेरी लैता गेदा ऐ। दौने पासे दा भारी गोलीबारी होआ करदी ऐ। होर व्योरे गी बलगेया जा'रदा ऐ।

<><><><><>

## Traffice-Week

ट्रांसपोर्ट राज्यमंत्री सुनील शर्मा होरें कल जम्मू दे गुलशन ग्राउंड थमां 29में राष्ट्रीय सड़क सुरक्षा हफते दी शुरुआत कराई। इस मौके अपने संबोधनै च मंत्री होरें सड़क सुरक्षा, ते इत सरबंधी हफता मनाने दे महत्वै पर लोऽ पाई ते आक्खेआ जे सड़क सुरक्षा दा सनेया हर इक व्यक्ति तोड़ी पुज्जना लोडचदा। उनें दस्सेआ जे इक अंदाजे मुजब भारत च हर ब'रे पेश औने आले 8 लक्ख कोला मते सड़क हादसें च कोई डेढ़ लक्ख लोकें दी मौत होई जंदी ऐ। उनें दस्सेआ जे शड़ा जम्मू-कश्मीर च गै इक ब'रे च कोई 5 हजार सड़क हादसे पेश औंदे न जिन्दे च इक हजार कोला मते लोकें दी जान चली जंदी ऐ। उनें लोकें इग्गे अपील कीती जे ओह

अपनी ते होरनें दी सुरक्षा लेई सड़क ते ट्रैफिक नियमें दा पालन करन, Helmet ते Seat Belt दा इस्तमाल करन ते गड्डी चलांदे होई Mobile Phone दा इस्तमाल नेई करन।

<><><><><>

## CS- Sewerage

मुख्य सचिव बी.बी. व्यास होरें कल जम्मू च पैहले आले जवाहर लाल नेहरू राष्ट्रीय शैहरी नवीकरणीय मिशन तैह्त मंजूर कीती गेदिएं गंदे पानी दे नकास सरबंधी परियोजनाएं बारै खडेरी गेदी रियासती सतह दी उच्च इख्तयारें आली संचालन कमेटी दी अध्यक्षता कीती। मीटिंगै च जानकारी दिती गेई जे जम्मू ते श्रीनगर शैहरै लेई द'ऊं परियोजना केंद्र आस्सेआ मंजूर कीतियां गेइयां हियां जिन्दे पर बिलतरतीब 1 अरब 29 करोड़ 23 लख ते 1 अरब 32 करोड़ 92 लख रपे दी लागत दा अंदाला हा। मुख्य सचिव होरें सरबंधित चीफ इंजीनियरें, UEFD, ते म्यूनिसिपल कमीशनरें गी आक्खेआ जे ओह इनें परियोजनाएं पर जारी कम्मे दी रफतार ते प्रगति पर उपरोतली तक्क बनाई रक्खन। ते जित्थे कुदरै बी कोई अड़चन जां दिक्कत परेशानी होवै उसी तुरत दूर कीता जा। मगरा मुख्य सचिव होरें जम्मू अखनूर सड़कै गी चैड़ा करियें कन्नो-कन्नी च'ऊं गड्डिङएं दे लंघने जोग बनाने दे कम्मै दी प्रति दा बी जायजा लैता। मुख्य सचिव होरें सरबंधित अधिकारिएं गी जिमीए दी क्लीयरेंस ते गैर कनूनी तौरा पर कीते गेदे कब्जे हटाने दे कम्मै च तेजी आनने दा निर्देश दिता।

<><><><><>

## Sports

गांधी मेमोरियल साईंस कॉलेज, जम्मू इच खेड्डी जा'रदी विशेष खढारियें दी 7मीं उत्तरी ज़ोन क्रिकेट प्रतियोगिता कल सम्पन्न होई। पुलस विभाग दे डायरैक्टर जनरल डॉक्टर एस.पी. वैद समापन समारोह दे मुख्य परौहने हे ते उनें प्रतियोगिता इच हिस्सा लैने आले खढारियें गी ईनाम बंडे। इस म्हीनें दी 18 तरीक थमां शुरू होई दी इस प्रतियोगिता दा आयोजन जम्मू एंड कश्मीर क्रिकेट एसोसिएशन ऑफ द Deaf आस्सेआ कीता गेदा हा। जेदे उनें विशेष खढारियें हिस्सा लैता जेडे सुनी नेई सकदे न।

<><><><><>

## Darbar Poonch

पुंछ दे जिला विकास कमीशनर मोहम्मद एजाज असद होरें मंडी च अज्ज इक कैम्प लाइयै लोकें दी समस्याएं गी सुनेआ। इलाकें दे लोकें बुनियादी ढांचागत सहूलतें ते बन्ने आली तारबंदी दे कन्नै लगदे लोकें दी समस्याएं बारै DC होरें गी दस्सेआ। डी.सी. पुंछ होरें लोकें दी समस्याएं गी सुनेआ ते ऐदी लेई लोडचदे निर्देश मौके पर गै सरबंधित विभागें दे अधिकारियें गी जारी कीते।

<><><><><>

## Weather

मौसम विभाग आस्सेआ दिक्ती गेदी जानकारी मताबक जम्मू च अज्ज बडलै दा घट्टो-घट्ट तापमान 18 अशारिया 6 डिग्री सैलसियस जिसलै के कल दिनें दा बद्धो-बद्ध तापमान 34 अशारिया 6 डिग्री दर्ज कीता गेआ। इस दरान ब्हाऊ च नमीं दी मात्रा 43 फीसद रिकार्ड कीता गेआ।

<><><><><>